



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym TAPAK 8

PM Shehbaz Sharif-i sorkar sentong nung red carpet nokdang

Mirabai Chanu IWF World Cup nung asayatsü



VOL. XXI ISSUE NO. 168 (ADOK 168) DIMAPUR TENTONÜ (MONDAY) RONGCHII (APRIL) 01, 2024 ₹ 5.00

Nagaland nung Easter Deobar mongogo; KBPF-i Sunrise Service ayongzüka agi



(Abelen) Kohima Baptist Pastors Fellowship (KBPF)-i The Heritage, Old DC Bungalow nung Sunrise Service ayonga agidang Kohima Ao Baptist Arogo tenüng nung ken atenba angur. (Achiji) Deobarnep Dimapur Ao Baptist Arogo kübok Yinsem Fellowship nung Christian Education Ministry tanurtemi Easter nüngtem nung entsü tobur junga renema bener aruba angur.

Kohima, March 31, 2024 (TYO): Kohima nung aliba The Heritage, Old DC Bungalow nung Deobarnep tamangertemi Sunrise Service nung kanga longsoa denogo.

Alima ajunga den külemi Nagaland nunga Deobarnü Resurrection Sunday ta ajaba Easter mongogo.

Good Friday nung Yisu Khrista kangki nung metabasülen tasemnübuba tasü madak takok anguba tenüng nung Easter Sunday amonger.

Kohima Baptist Pastors Fellowship (KBPF)-i The Heritage nung ayongzüka agiba sentong nung nisung aika aden aser parnoki tenüngsang agütsüba den temenen nungi meimchirtem kümzüksü atema

sarasadema liasü.

State Chaplain Rev J. W. Yamyap Konyak-i len ania sarasadem dang linük nung Khristantem reshikangshiba atema sarasademtsü.

Assam sorkari "Assam Healing (Prevention of Evil) Practices Bill, 2024" agizükogo anungji iba bill anema shisatsü agüjang ta tanep sarasadem.

"Khristantemi magic mamshir saka sarasadem ajanga taneptsü angubaji Tsüngrem nungi lir" ta Rev J. W. Yamyap Konyak-i ashi.

Paisa tesentepertem den Easter salem abendang "iba benjung ya leper tazüng indang benjung ka lir kechiyong Yisu Khrista tasü nungi shia aruba ajanga Arogo taküm lir" ta ashi.

"Yisu Khrista kangki nung

asüba aser tasü nungi shia aruba ajanga meimchir nem taküm tetezü tasen ka agütsü. Pa shia aruba ajanga Khristantem takok aser tetezü aketba taküm ka alitsü tashi agütsür" ta KBPF president Rev. Vezopa Rhakho-i ashi.

"Tanaben shia aruba ya Osangtajung indang tongtiba lir aser iba ya medeni Khristan yimsü mali. Khrista kangki nung metabas Pa tasü nungi shia aruba ajanga meimchirtem temenen talenba nungi salatsüogo" ta Rev. Vezopa-isa ashi.

"Tasü nungi shia aruba ya Laishiba indang temulungiang lir aser iba ya medeni Khristan yimsü mali kechiyong iba ya ajanga Yisu Khrista ya Tsüngrem jabaso chichiba ta kuli agütsüogo" ta paisa ashi.

Iba sentong nung mendenji

Sangtam Baptist Church Pastor Rev. Thsadongsa Sangtam liasü aser Poumai Baptist Church Kohima Pastor Rev. Thaongaolü Rosü-i temoatsü meshir tenzü.

Sümi Aphuyemi Baptist Church Kohima aser Kohima Ao Baptist Arogo ajanga ken ajanga tenüngsang agütsür aser Lotha Baptist Church pastor Rev. Benry Lotha-i tenüngsang agüja sarasadem.

Rio aser Patton nati Easter salem aben:

Nagaland Chief Minister Neiphiu Rio aser Deputy Chief Minister & BJP Legislature Party leader, Yanthungo Patton nati Easter salem metetdaksüogo.

Good Friday nung Yisu-i temeim tulutiba sayuba sülen Easter Sunday nung Pa shia arua

tashi tulutiba sayuogo. Easter indang sayatenya ajanga asenok takütem nung temeim, teimla aser tepela bentsür arungma. Ni nisung ajak dangi Tepela aser Temoatsü Easter salem abener" ta Chief Minister Rio-i ashi.

"Nisung ajak dangi Temoatsü Easter salem abener. Asenoki Kümtetdakba Yisu Khrista shia aruba aser Pai tasüba madak takok anguba benjungtepdang, Khrista-i bendanga agütsüba ajanga teti taküm alitsü tenangzüka agütsüba asoshi pelatepdi. Iba anogo ajanga asenok dang temeim tashi, tatok agütsüba aser mera tasentem agitsü bilemtetdaksür" ta Deputy CM Patton-ia ashi.

Tanü Nagaland nung arogo balala nung Easter services balala ayongzüka agiogo.

Guwahati Airport kilem ondok Manipur nung tsüngi agi nisung ka aiset

Guwahati, March 31, 2024 (Agencies): Deobar nikongdang Guwahati nung yirpu süiba aser tzünglu kanga aruba ajanga Lokapriya Gopinath Bordoloi International Airport nung kilem shilem ka ondok.

Yipru tesashi ajanga terminal building nung kilem ondok aser LGBTI airport anasa süngdong tulu ka laoba ajanga lenmang noktanga liasü.

Iba ajanga airport ketdangsürtemi tayimtsütem sota ayu aser tayimtsü 6 tangaleni yok, ta Chief Airport Officer Utpal Baruah-i ashi.

Deobarnü Manipur nunga tsüngi aidang arishi küm 11 tain tanur tebur ka aiset.

Imphal west district nung Regional Institute of Medical Sciences (RIMS) Imphal anasa Agriculture Quarters kima nung

tanubosangji tsüngi agi aiset ta police-i ashi.

Mizoram nunga Deobarnep tesem balala nung mopung tesashi aonba aser tzünglu aruba ajanga teraksa aika bentsür aruogo.

Champhai district nung yipru ajanga Lungtan village nung aliba United Pentecostal Church (UPC) meyong tenla ki chirep aser ano Aizawl district nunga Sialsuk nunga tenla ki ka raksatsü.

India Meteorological Department (IMD)-i April 4, 2024 tashi Northeast India nung tzünglu arutsü aser yirpu süitsü metetdaksüogo.

Taruba ghonda 24 tsünga Assam, Meghalaya, Nagaland, Manipur, Mizoram aser Tripura nung tzünglu kanga arutsü. Maneni, April 4 tashi Assam aser Meghalaya nung tzünglu terara arutsü ta IMD-isa ashi.

Arunachal assembly menden 50 atema candidate 133 lir

Itanagar, March 31, 2024 (Agencies): Arunachal Pradesh nung assembly elections agitsü jakdang BJP-i menden 10 nung takok nguogo.

Tetokteper mali takok angurtem rongnung Chief Minister Pema Khandu aser mezüng atema toktepeba candidate ana- Ratu Tech (Sagalee) aser Hage Appa (Ziro-Hapoli) na dena lir.

BJP-itanungba menden 50 nung

tokteper saka opposition Congress-ibo menden 19 nung dang tokteper.

Külen, National People's Party (NPP)-i assembly menden 20, Nationalist Congress Party (NCP)-i menden 14 aser People's Party of Arunachal-i menden 11 nung tokteper.

Maneni, Arunachal Democratic Party-ia menden 4 nung tokteper aser Lok Janashakti Party-i menden 1 nung tokteper.

Taküm assembly elections nung mezüng atema toktepeba candidate 80 lir aser parnokji Congress nungi 17, BJP nungi 14 aser NPP nungi 16 lir.

Tetsür candidate 8 tashi lir aser parnokji BJP nungi 4, Congress nungi 3 aser Independent candidate ka lir.

Arunachal Pradesh assembly election ya Lok Sabha elections den külemi agitsü.

PDA sorkari Bahar Uddin rongsen sota ayutsüla: RPP

Dimapur, March 31, 2024, (TYO): "Druglord of the North East" ta ajaba Bahar Uddin apuba ajanga Naga nung dang mapang shitak nung sorkar tajung ka shimtsü nenshiogo ta Rising People's Party (RPP)-i metetdaksü. Parnokisa PDA sorkar dang Bahar Uddin meyong rongsen sota ayutsü ayongzü.

Chief Minister Neiphiu Rio-i 2003 nungi sorkar ketdangsütsü tenzüka sülen Nagaland nung ozüng melii akümba aser ochimashi ajanga Bahar Uddin adok, ta RPP-i ashi.

Bahar Uddin-i küm aika Dimapur nungi drugs shibelenba mapa inyaka aru aser March 22,

2023 nü Nagaland aser Assam police yaritepa pa puogo. Nagaland DGP, Rupin Sharma lenisüba kübok "War on Drugs" tenzüka nung pa apuba ya takok tulu ka ama züngshir.

"War on Drugs" ya DGP-i anir Nagaland police ajanga shisateta tenzüka mapa ka lir. Iba ya PDA policy den kecha sendaktepa mali kechiyong state sorkari 'law & order' aser 'Rule of law' nungi pilar mapang talangka süiogo, ta RPP-i ashi.

Ochimashi politicians aser police aser Dimapur nung tashi agütsürtemi Bahar Uddin kümzüka ayuba ajanga pai iba mapa inyaka arutet ta bilemer. Pai police dang nangzükyä alitsü aser

talisa pa den yaritepa nisung aser teloktem Nagaland police-i yimjak nung metetdaksütsüla, ta RPP-isa ashi.

Nagaland police-i pa apuba osang dak alaka tanü tashi nung tanga osang kecha memetetdaksü lir aser iba ajanga Nagaland police ya political pressure kübok lir ama bilemtsüsa akümer. Anungji iba ama tensaji ka ajurua lira NIA ket nung iba ken o agütsütsüla, ta RPP-isa metetdaksü.

Rising People's Party (RPP)-isa PDA sorkar dang Bahar Uddin indang kiojen ajak drugs & psychotropic substances den sendakba ozüng tapet kübok sota ayutsü ayongzüko.

DIMAPUR AO BAPTIST AROGO HEALING MINISTRY TANEPTSÜ SENTONG

DABA main church Duncan nung April 3, 2024 anepdang 7:00 am nungi sentong tenzüksü. Tamang agi arung, ali mozü agi maneptetba Tashidak Tsüngremibo aneptsütet. Tsüngrem asoshi kecha tamakoktsü malia. Yisui la dang ashi "Tenü nü tamang agi na junga kümogo... Junga liang." Mark 5:34.

Sd/-
Pastor, DABA.

Raj Bhavan Kohoima nung Rajasthan state Foundation Day amung



Dimapur, Metsüremi/March 31 (TYO): Rajasthan state indang Foundation Day nungtem nung sentong ka Raj Bhavan Kohoima nung March 30 nü agia liasü.

Iba sentong nung jembidang, Rajasthan ya India nung state tulutiba kisung dang masü socio-cultural, economic aser puti otsü tsütsüa tongtipang shilem lir, ta Nagaland Angh La Ganesan-ashi.

Rajasthan yagi India indang sobaliba, rongsenketzung, ecological aser lenla balala nung shilem tajung agir. Sobaliba tebour tajung, puti otsü nung tatalokba tongtipang, rongsenketzung nung teyari tulu agütsüba aser tesem tongtipang nung amenoka aliba ajanga asen linük ayak, rongsenketzung aser security tashi sayur, ta pai ashi.

Rajasthan ya India indang chuba korang nung sentilong lir.

India nung sobaliba tsütsü sübosolemtsü, achiajemtsü aser kin balala taktepa aliba indang jembidang, kati ka den sensaksema aser agizükteta alitsü tongtipang, ta ashi.

Iba sentong yagi sobaliba tsütsü apu latsür aser India nung

lenla balala tsungta telemsa aliba lirumedema kumdaktsür, ta ashi.

Iba sentong ya ajanga state balala nung süaka linük telungzük nung alirtem benjonger, ta pai ashi.

Pai Rajasthan nung shishilempar, talisa Marwari nungeri mapang talangka nungi state nung arua tatishitsü tajung sayua tenzükba ajanga local entrepreneurs adoker, ta pai ashi.

Parnoki India nung shishilempaba tsütsü tongti shilem agir aser ibaji Nagaland nung dena lir. Parnoki shishilempaba nung shilem agiba ajanga region nung osettsüset tem peria angur aser parnoki business amenokba ajanga state nung aliba nüburtem nem employment maangka agüja Nagaland ya India tesem ajungalen sendakteptsür, ta Angh La Ganesan-ashi.

Shishilempaba nung shilem agiba den külemi Nagaland nung alirtemi loktiliba temaba jenjangi ajungketba nung shilem tulu agir, ta ashi.

Rajasthan nungi arua alirtemi shisaliok, healthcare aser social welfare tsütsü ajaki metettsüsa

shilem balala agia arutar. Parnok indang educational institutions, scholarship programs aser healthcare services ajanga Naga nung kanga yarir aser takum nunga temelenshi arudaktsür, ta pai ashi.

Paisa Nagaland aser Rajasthan tsungta tesendaktep tali tajungba kumdaktsütsü asoshi temulung agütsütsü, ta ashi.

Iba sentong nung Rajasthan Angh Kalraj Mishra-i salem osang shiokba aser Rajasthan indang sobaliba aser yimsü-yimpong balala video sayua liasü.

Sentong tenzükba Secretary to Governor, Rajesh Soundararajan, IAS ajanga o tatsüka jembi aser Conservator of Forest, Dimapur, Raj Priy Singh, IFoS ajanga Rajasthan state indang rateta ashi.

Iba sülen Shree Marwari Samaj, Dimapur indang general secretary aser BJP Nagaland vice president Basu Damani-ia o jembia liasü.

Iba sentong nung Dimapur nung aliba Rajasthan nungeri sobaliba tsütsü agi shilem agia liasü.

Mizoram Lok Sabha atema candidate trok tokteper

Aizawl, Metsüremi/March 31 (Agencies): Mizoram nungi Lok Sabha menden ka atema candidate trok tokteptsü, aser iba atema April 19, 2024 nü vote agütsütsü, ta ketdangsur kati ashi.

Mizoram Additional Chief Electoral Officer H Lianzela-i ashiba agi, candidate trok nungya tetsür ka lir aser parnok ajaki Brehostibarnü scrutiny ajangogo aser Honibarnü tashinung candidate kati pei nomination withdraw masü.

April 2019 nung agiba Lok Sabha election mapang tongtepa candidate ama taküm election nunga candidate trok tokteper. 2019 küm tetsür ka densema candidate trok toktepa liasü.

Mizoram nung tang sorkar kumteta aliba Zoram People's Movement (ZPM) party ya Lok Sabha election nung tang mezüngbuba tokteper aser parnoki arishi küm 46 tain Richard Vanlalhmangaiha shima lir aser opposition Mizo National Front (MNF) nungi tang Rajya Sabha nung mena alisang arishi küm 54 tain K. Vanlalvena yoker.

BJP-i state tir arishi küm 53 tain Vanlalhmuaaka yoker aser Congress-i arishi küm 64 tain retired Mizoram Police Service (MPS) officer aser former state home secretary Lalbiakzama shima lir.

People's Conference (PC)

party-i kentener a rishi küm 46 tain Rita Malsawmi yoker aser 2019 Lok Sabha election nung tamakok ajurusang taoba BJP lenir aser ex-Congress worker arishi küm 59 tain Lalhriatrenga Chhangte ya taküm independent candidate ama tokteptsü.

Candidate trok rongnung Chhangte ya dang Lok Sabha election nung taoba mapanga toktepdanga lir aser 2021 assembly by-poll nung tamakok ajuru, aser BJP nungi Vanlalhmuaaka ya asemben assembly election nung toktepdanga lir saka takok khena mangu aser MNF nominee K. Vanlalvena ya 2023 assembly polls aser 2015 assembly by-poll nung toktepa saka takok mangu.

1972 nungi tenzükba Mizoram Lok Sabha election otsü nung state nung aliba ruling party ajanga election 11 nung takok ngua arua lir aser opposition party temi 1980 aser 1998 nung dang takok ngua lir.

1984 aser 2013 tsungta assembly election ponguben takok anguba Congress yagi Lok Sabha election 1984, 1989, 1991, 1996, 2009 aser 2014 nung takok ngua lir aser 1987 aser 2019 tsungta state assembly election pezüben takok ngua aliba MNF yagi 2004 aser 2019 Lok Sabha election nung takok ngua liasü.

1999 küm MNF ya Mizoram nung ruling party alidang MNF aser Mizoram People's

Conference ajanga yariba independent candidate Valalzawma-i Lok Sabha election nung takok ngua liasü.

1984 küm Mizoram nung Lok Sabha election nung vote magütsü, kechiaser Congress candidate Lalduhoma (tang CM inyaka alisang) den tokteper meliasü.

ZPM ya 2019 Lok Sabha election nung Congress den lungjemer toktepa takümbo pei meten tokteper.

Taoba küm November ita assembly election nung menden 40 asoshi toktepa mapang ZPM ajanga menden 27 ngua MNF atsüngdok, shirnoki menden 10 dang ngutet.

Taküm Lok Sabha election nung Mizoram nung vote agütsütsü temsüa alir nisung lakh 8.6 lir, aser item rongnung tetsür lakh 4.41 aser tang mezüng vote agütsütsü nisung 36,214 lir.

2019 Lok Sabha elections mapang Mizoram nung vote agütsür shilem 63.13 liasü aser 2023 state assembly election nung shilem 80 dak temai vote agütsü.

2019 Lok Sabha election nung MNF-i vote shilem 44.89 angu, ZPM-Congress meyokteper shilem 43.26, BJP-i shilem 5.75, People's Representation for Identity and Status of Mizoram (PRISM) ajanga shilem 2.67 aser independent candidate anati shilem 2.94 ngua liasü.

Aoleang aser Monyu benjong salem lemsateper

Dimapur, Metsüremi/March 31 (TYO): Konyak aser Phom kin nungi adianu aser adianutsürtem den Aoleang aser Monyu benjong salem lemsateper, ta NPCC tir S Supongmeren Jamir-i sangdong ka ajanga ashi.

Nenok temeim aser dangar dang aria bilema temeim sayuba tanüla benjongdang Tulusang Tsüngremi nenok kibong, kinunger ajak küm tepiyong moajang ta sarasademtsür, ta paisa ashi.

Deputy Chief Minister T.R. Zeliang-ia sangdong ka nung Konyak aser Phom nung dang Aoleang aser

Monyu benjong salem lemsatepa liasü.

Aoleang aser Monyu ya Konyak aser Phom kin atema tongtipang benjong ka lir, koba ajanga loktiliba aser tanüla tsütsü tongtipang shilem agir aser iba mapang kin anaprong-i Tsüngrem temoatsü bushir, ta TR Zeliang-ashi.

Iba benjong ajanga temeimtep, tesendaktep, yimjung aser sobaliba tali temaba jenjangi ajungketer, ta Dy CM Zeliang-ashi.

Aoleang aser Monyu benjongmung tenüng nung ajak dangi tepela salem abener, ta paisa sangdong ajanga ashi.

SJC (A), Jakhama Alumni Association senden ayonger

Dimapur, Metsüremi/March 31 (TYO): St. Joseph's College (A), Jakhama indang Alumni Association pur lokti senden April 5, 2024 nü amentsü, ta sangdong ka ajanga

ashi. Senden ya anüngdang 12:30 ako nungi tenzükba college campus nung amentsü, anungji züngsem ajak pelashishia jaoker, ta sangdong ajanga ashi.

Easter anogo Mizoram nung yipru tesashi ait



Aizawl, Metsüremi/March 31 (Agencies): Easter anepdang mopung tashi tait den tzünglu tesashi agi Mizoram tesem balala nung kongshia teraksa bener arutsü.

Ajisüaka iba lendong nung nisung asü-amaba osangbo mali.

Mizoram anüdoklen Champhai district kübok Lungtan yimdak United Pentecostal Church (UPC) indang tekülem ki ka lao aser Aizawl district kübok Sialsuk nunga tekülem ki ka laoa liasü.

Presbyterian Church indang kibong lanu mungdang ka April 12 & 13 anogotem agitsü asoshi Serchhip district kübok East Lungdar nung süki yanglua aliba iba yipru yagi okshia raksatsü.

Iba den Champhai kübok Rashi tesem nung Assam-type ki ka aser Aizawl district kübok Baktawng yimdak ki kar raksatsü.

Iba osang züluba mapang tashinung danga district tem nung atalokba osang tejangja meliasü.

Manipur nung ozüng alema inyaksangshir nisung 356 apu

Imphal, Metsüremi/March 31 (Agencies): Manipur nung tensa azüoka yimjung lidaktsütsü mechi security forces temi tesem balala nung search operations agia liasü.

Sepaitemi Kangpokpi district kübok Changoubung yimdak search operations agidang 9mm country-made pistol ka den magazine ka, 7.65mm pistol ka den magazine aser injang pongu nguteta liasü.

Tongtipang transportation lenmangtem nung nungdakba osettsüset tetsükdak makai abentsü atema sepaitemi mera balala agia lir.

NH-37 nung gari 250 aser NH-2 nung gari 270 tashi tongtipang supplies bener jajjar asünung, security forces temi item tesemtem nunga tanükba agütsür.

Security mera tajungtiba nung agitettsü mechi Manipur nung district balala kübok Nakas/Checkpoints 125 amenokalir.

Temulung melemtettsüsa mapatem meita reprangtsü asoshi item checkpoints ya kanga tongtipang lir.

Ozüng nung aibelenba dak sendakba nung ozüng amshirtemi Manipur nung nisung 356 pua lir aser ano tarutsü anogotem nunga state nung tzüzüng-ozüng shidak amshitsü temulungtetba nung lir.

Security forces temi search operation kanga yakyaka agia nüburtem asoshi tongtipang osettsüset tetsükdaktsü makai state telungi bener aitba aser mera balala agiba ajanga sepaitemi Manipur nung tensa azüoka ayutsü merangba sayur.

INDIA teloktepi Election Commission nem takhangba 5 agütsür



March 31, 2024 nü Ramleela Maidan, New Delhi nung opposition INDIA teloktepi ayongzükba 'Loktantra Bachao Rally' nung Shiv Sena (UBT) tongti Uddhav Thackeray, SP tongti Akhilesh Yadav, AAP lenir Gopal Rai, Congress leni Priyanka Gandhi Vadra, CPI(M) General Secretary Sitaram Yechury, TMC MP, Derek O'Brien aser PDP tongti Mehbooba Mufti nunger adenba noksa nung angur.

New Delhi, Metsüremi/ March 31 (Agencies): Amongnü opposition INDIA teloktep nung dena aliba party balala nungi lenirtemi Delhi nung aliba Ramlila Maidan nung adenshia 'Loktantra Bachao Rally' (Save Democracy Rally) agiogo.

Iba rally nung opposition lenirtemi linük nung democracy jenjang tamajungba akümba atema tebilemstü lemsatepba den külemi Delhi Chief Minister, Arvind Kejriwal aser taoba mapang Jharkhand Chief Minister, Hemant Soren na tangsa chiokang, ta takhangba agütsü.

Iba sentong nungji Arvind Kejriwal kinüngtsü, Sunita Kejriwal aser Hemant Soren kinüngtsü, Kalpana Soren nata densema liasü.

Iba sentong nungji opposition lenirtemi, ruling BJP-i tashishiba ola songtemtsü aser opposition tashi meitdaksütsü atema tim masüba nung central investigative agencies amshir, ta

aitsü. Congress lenir, Priyanka Gandhi Vadra-i election timi agitsü nükjidong nung Election Commission nem takhangba onük pongu agütsü.

Laisa Enforcement Directorate, CBI aser Income Tax Department ama agency balalai opposition party tem anema inyakba ya tangsa anentsüla, ta takhangba agütsü.

INDIA teloktepisa, electoral bonds scheme nung senotsü tsütsü ochimashi aliba ya Supreme Court-i ketdangsüa Special Investigation Team (SIT)-i bushisüngdangtsüla, ta takhangba agütsüba den külemi, iba scheme ya BJP-i senotsü rakzükraaktemba scheme lir, ta aitsü.

Congress lenir, Rahul Gandhi-i, election inyakyim aziüktsü BJP dang melaba aser linük temzüng yanglushiba ajanga takoksa tulu ajurutsü, ta tekümdangtsü metetdaksü.

AAP nungi Bhagwant Mann-i, Arvind Kejriwal-i

benokba tangatbatemji pa apuba ajanga menokdangtetsü, ta ashi.

Mann-i, "Nenoki Arvind Kejriwal aputsü akok, ajisüaka nenoki pa indang tangatbatem aputsü akok asü? India nung Kejriwal lakh aika asobaji nenoki koba jail nung puoktsü?" ta asüngdang.

Ato kilonser Narendra Modi-i Uttar Pradesh nung Lok Sabha election atema BJP nüboyim tenzüktsüba anogo nung opposition lenirtemi iba rally agiogo.

Samajwadi Party tongti lenir, Akhilesh Yadav-i, "Item nisungtemi menden 400 dak tema angutsü ta yimiyim ayimer. Nenoki menden 400 dak tema angutsü süra kechiba nenoki AAP lenir (Kejriwal) tsübur?" ta ashi.

Tayimtsü anendak osangbenertem den jembidang Akhilesh Yadav-i, Delhi Chief Minister Arvind Kejriwal apuba atema alima tesem ajaklen nungi BJP aitsür, ta ashi.

Congress-i April 5 nü manifesto sayatsü

New Delhi, Metsüremi/ March 31 (Agencies): Congress party-i taruba Lok Sabha election atema April 5, 2024 nü party manifesto sayatsü, ta metetdaksü.

Congress-isa, BJP-i kanga menor ang manifesto committee tenteter, ta aitsü.

Honibarnü BJP-i party manifesto atema züngsem 27 aliba committee ka tentetogo; iba committee nung tongtiji Defence Minister Rajnath Singh lir.

Amongnü Congress general secretary, Jairam Ramesh-i, Congress party-i 'Paanch Nyay' aser 'Pachees Guarantees' bo March 16 nü sangdongba den 'Ghar Ghar Guarantee' campaign tenzükogo; iba kübok linük tesem ajaklen April 3 nungi tenzüka guarantee cards crore 8 agütsütsü, ta metetdaksü.

Congress indang official manifesto ji April 5 nü sayatsü.

"BJP-i kanga menor ang committe tentetogo, iba ya

nüngtem atema dang lir. Ibaji ajanga party-i nüburtem mezüngshiba sayur," ta Ramesh-i aitsü.

"Congress manifesto ya linük tesem ajaklen asüngdangyaba aser email den onok indang 'Awaaz Bharat Ki' website ajanga agizükba tebilemba onük meyrjang aika nung ajemdaker renemba manifesto lir. Congress manifesto ajanga nüburtem ola sayur," ta pai metetdaksü.

"BJP-i Income Tax claim notices agütsüba ajanga Congress jangjongtsü merangtsü, saka Congress-i metsübur mesüra marendaki inyaksü. Onok renema lir aser onoki takok angutsü," ta paisa metetdaksü.

BJP-i manifesto draft committee tentetogo aser iba committee nung tongtiji Defence Minister Rajnath Singh, convenor ji Finance Minister Nirmala Sitharaman aser co-convenor ji Union minister Piyush Goyal lir.

Tir Murmu-i BJP lenir tain, LK Advani nem Bharat Ratna agütsü



March 31, 2024 nü New Delhi nung linük Tir, Droupadi Murmu-i BJP lenir tain, L K Advani nem Bharat Ratna award agütsüdang tangokba noksa nung agur. Kasa noksa nung Ato kilonser Narendra Modi-a angur.

New Delhi, March 31 (Agencies): Amongnü linük Tir, Droupadi Murmu-i BJP lenir tain aser taoba mapang Deputy Ato kilonser, LK Advani'er ki tsüngdong oa pa nem Bharat Ratna award agütsüogo.

Linük Tir den Ato kilonser Narendra Modi, tatong Tir Jagdeep Dhankhar aser taoba mapang tatong Tir, M Venkaiah Naidu nungera liasü.

Honibarnü Rashtrapati Bhavan nung Tiri taoba mapang Ato kilonser ana, asür Chaudhary Charan Singh aser

asür PV Narasimha Rao na den taoba mapang Bihar chief minister asür Karpoori Thakur aser Agri scientist, asür MS Swaminathan nunger nem-a Bharat Ratna award agüja liasü. Par kinüngertemi parnok atema award agizükja liasü.

LK Advani temang mejungi dang aliba agi par kidangi tsüngdong oa iba award agütsü.

Iba jakdang Modi-i X ajanga, "LK Advani nem Bharat Ratna agütsütsü, ta ni tepela nung sangdonger. Ni pa den jembioigo aser iba sempet atema pa nem tenüngsang agütsüogo. Asen mapang nung kanga akhümtsüba alirtem rongnung pa ka lir; pai India terenlok atema shilem tulu agiogo. Pa taküm tilaka nungi dang tenzüka Deputy Ato kilonser tashi inyaka linük tenzükogo. Pai Home Minister aser I&B Minister-a inyakogo," ta metetdakja liasü.

LK Advani ya 1927 küm November 8 nü Karachi, Pakistan nung aso. 1980 küm BJP tentetba mapang nungi pa Tir inyaka liasü. BJP Tir mapang talangtiba inyaksangji pa lir.

Pa Parliament nung küm 30 jungnüa inyakogo. Atal Bihari Vajpayee Ato kilonser inyakba mapang nung pa home minister liasü iba sülen deputy prime minister (1999-2004) inyak.

NDA-i ochimashi anema rarar; Opposition-i ochimashir kümzükur: PM Modi

New Delhi, March 31 (Agencies): Amongnü Ato kilonser Narendra Modi-i Uttar Pradesh nung Lok Sabha election nüboyim Meerut yimti nungi tenzükogo.

Iba sentong nung jembidang pai, taruba election ya sorkar ka shimtsü atema masü saka terenlok India küm daksütsü atema lir, ta ashi.

Tawa central agency temi opposition INDIA teloktep nungi lenirtem kar apuba dak sendakba nung pai, nisung

karbo jashir kechiyong pai ochimashi anema inyaker, ta ashi.

"Tesüiba küm 10 tsüngda onoki ochimashi anema raraba linüki nguogo. Shingaia sensakertem ket nungi mauyatsü atema onoki inyaker. Ni ochimashi anema rarar, ibayongji tanü ochimashirtem jail nung puoka lir," ta pai ashi.

Paisa, taruba election ya ochimashi anema rarar NDA aser ochimashirtem kümzüktsü atema rarar opposition na

tsüngda tetoktepba lir, ta ashi.

"Ni ochimashi anema dang bushisüngdang masü. Ozü linük nung nüburtem ket nungi auyartem ket nungi rongsenji tanaben meshia nüburtem nem meyipa agütsütsü," ta pai ashi.

"Ozü sorkari küm sük tasembuba atema renem tenzükogo. Taruba küm 5 atema onoki asalentong yanglur. Mezüngbuba anogo 100 nung inyaksü atema tongti teletmetbatem agitsü asoshi inyakdar," ta paisa metetdaksü.



Thiruvananthapuram, March 31, 2024 : Easter Sunday nü Kerala yimtiba, Thiruvananthapuram nung aliba St. Joseph Tenla kidang state Angh, Arif Mohammad Khan teküalem sentong nung adenba noksa nung angur.



TIR YIMYIM

YIMOBILEM (EDITORIAL)

DIMAPUR TENTONÜ, APRIL (RONGCHII) 01, 2024

Lendongbang nung alirtem

Asenok ya kin tila saka alima tulu nung tangar sobaliba aser tamangba yimsü amangertem agi amokbanger aliba yimten kübok alir asünungji, asenoki meteta aser memeteti temzüng ozüng aika agi alena lir. Item temzüng ozüngtemji karbo asenok dak mapet aser item temzüng ozüngtem jagi asenok lendong nungi kümzüksü melen lendong tulu ajurutsüsa alena lir. Item temzüng rongnung Armed Forces (Special Powers) Act, 1958 ya ka asütsü. Iba ozüng yagi army-tem nem pei sünütsü süa parnoki mulung melemteti aliba nisungtem dak inyaksü temeten aser tashi agüja lir. Atangji, Nagaland ama telong nung lia injang prangpong amshia yimten nüchiso bushiba lima nung sepaitem asoshia tekümdangtsü tulu lir, anungji parnok taküm kümzüksü asoshia tangar dang nungi tali temeten aser tashi balaka nungdaker. Ajisüaka, linük nung nübortem rongsen jenti endoka sepaitem ayuba nükjidongji nübortem nem sepaitem tsübudakja alitsüba masü saka sepaitem aliba agi nübortem sadema senzütetsü aser ayipjanga amui otettsüsa alitsü asoshi lir. Iba tangatetba nung kodang Nagaland nung district ti nung anosa AFSPA ozüng ya alitsü sangdongba osang ya bilemdangdir, iba AFSPA yabo nübortem kümzüksü asoshi masü saka nübortem lendong tului idaktsütsüba ozüng lir ta angatetsü. Aji oda, tangbo district ti nung dang iba ozüng ya lir, saka tamalen Nagaland ajaklen iba ozüng agi alena alidang India nung sepaitem ket nung Naga nung reshikangshi aser timtem lendong ajuruba otsü jenti lir. Item ayatai otsütem rongnung tanü asüng lanurtemia meteta atalokba lendongtemji küm 30 jakdang Mokochung aser Kohima town nung India sapaitem yiar ama kümer nisung aser kiojen kecha tapayu mali timtem lendong agütsüba ayatai anogotem den to ano küm ana jakdang Oting nung ayangertem mapa nungi pei yim bushia oa alidang India nung sepaitemisa parnok kasete külenang tasü mang bener ajentsü merangba mezüngmeshi ayatai lendong mapa to ka asütsü. 1958 küm AFSPA ya meyanglushidanga iba jakdang 1950s nung iba ama kasa ozüng kübok asen tsüraburtem talidak makatsüsa yim aser alu rongdoktsür reshikangshiba otsü tanübo asenoki angashiba dang masü saka kaket nung azünger. Item otsütemji asenoki amadokra, Israel nungertemi Yirusalem nung atalokba otsütem amadoker bendanglen alar jenjang agi temulung sür aliba amato asütsü. Aji oda, sepai ka nem pai mesüra lai nisung ka dak temulung melemi kija bilemba agi kasettsü temeten agütsüba dang masü saka ano iba mapa aser ken o ji okadak kecha nunga benoktsü makoktsüsa temeten agütsüabajibo, shitakba, nisung agi tizüktetla ozüng aser mapa ka masü. Ibaji dang masü saka India sepaitemi nür kidang telongpur kar adenshia lir ta temulung melemi bilem nung mesüra linük anema inyaker ozüng raksar kar anenzüka lir ta kisüng temulung melemi bilemba kija kuli agi nür kidang bomb ajungoktsütsü tashi, tashi aser temeten agüja alibajibo, asenoki süokia ia mebilemdanger dang ashi, asenok lendongbang nung yutsür asütsü. Atangji, AFSPA ozüng district songjen nung agüja aliba district ti rongnungji Mokochung meliaka, Mokochung district küboka Mangkolemba aser Tuli division-tem dena lir. Item tesemtem nungji kodang kechi ataloktsüar memetetba tia nung asenok alir ser nung asenoki AFSPA indang ya junga memetetba agi asenok shisamebulur asütsü akok. Item tesemtemji yutsür AFSPA agüja aliba district-tem Dimapur, Niuland aser Chümoukedima tesemtem yabo Naga nung ajak arok lima aser arok district amai kümogo. Atangji, AFSPA agientsüba ya state government dak tashi tuluka lir saka magienteter. Ibaji asenok ajak asoshi tebilemdangtsü aser tebilemstü asütsü. Atangji, asenoki AFSPA ya asen lima nungi tangsa tang magientettsü akok saka iba indang yabo jembitsüla aser angateta alitsüla. Iba jagi asenoki asenoksasa kümzükttetsü.

OLEMSABANG

SHIA ARUBA KHRISTA

(Yisu Tasü Nungi Shia Aruogo Ta Nai Kotaser Metet?)

~ Rev.Prof. Rongsen

(Yashi adok nungi...)

KHRISTAN TELANGZÜKBA

Thomai par medemertem dang ashi, Pa dak kojat agi tetsüng aser tepen nung angenba tarak aser tesa nung nu agi atsüngba tarak nungji kü teka agi mekongshi tashi ni Pa shia aruogo ta mamangtsü (Jn. 20:25). Au, Thoma dang Yisui menguaka amangertem temoatsüba ta ashi. Saka küli tejangja angutsü atema bushisungdangertem atemabo Thomai ashibaji shiak lir. Kechiyong küli tajungba ngua bushiteter amangbaji kanga agi tajungba aser iba ama tamangji takangba asür. Anungji asenoka tangar ashiba o nung dang masü saka aseni bushiteta angatetba aser ajangshiba nung asen tamang yangertsü merangtsüla. Tangar ashiba nung dang tamang amendakba nungji aiben lendong ajurur.

Shiruru tila, tulu ajaki parnok yimya dak aketba ama parnok nem timtem agütsüra ngudi aser majidi ta arur. Yamaji nisung shisatsü nunga lir. Nisung kari kar tak timtem kar agütsüra pai/lai meyiper langka ka inyaksü bilema aiter. Ya nisung aser shiruru ajak tak aketba yimya ka lir.

Yisu ain tulu aketba nubu ka liasü. Pa kecha tai maket surnung tiazü küli aika yanglua Pa rishikangshia sutaktsü. Aji oda Yisuji nisung dang asü asübo Pai Pa reshikangshirtemi hauna ta sutettsüsa langka kabo inyaker lila. Saka Pai kecha tamajung meinyak, saka parnoki Pa tak kechi tamajung inyak aji memeteti inyak, anungji parnok dang tai tokang ta ang sarasademtsü. Yamaji inyaksübaji nisung shisatsü aser taküm yimya nung maket. Nisung shisatsü nung aketba ama Pa anema tamajung inyakerter dang langka tamajung meyipa agütsütsü melena tajung ang inyakba jagi Paji nisung masü Tsüngrem liasü ta küli sayur.

Laishiba nung Yihuda nungrtemi Yisu tak lisu agi arep ta shia alibajilisu kija dangbo masü(Mt.27:26). Ibai lisu pungu,trok langteper lisu tatempang nungji ango mesuba Proki ama yin taju asr tekerak sentakloka lir aser kodang iba lisu jagi reptir item yin tejiratemji shi temang nungji jangoktsü aser kodang lisuji atsüzükdir shi tetsü aser taküp ajak shizüka alutsü ta asüba lisu liasü.

Nisung temang indang asüsa bushir mongintmi ashiba agi iba lisu jagi repa merenshir nisungtemji azü imseta melamela asür. Rom nung yimsusuba mapang Yisu ama nisung aika lisu agi repa kangki nung sutaktsü. Saka shinga-a masü mejentet ta otsü agi ashir. Aji oda Rom nung sepaitem tereprangi arudang Yisu suatoker alibaji azü imtema asü suti ta ashir. AnungjiArimethea nung Josephi Yisu temang kangki nungi agizükdangji Yisuji akiakia atanger liasü ta küli tejangja angur.Anungji Yisu kangki nungi agizükdang ano mesui liasü ta asübaji tamentakdak maka.

Yisu shia aruogo ta asüba küli tongtibangtibaji Pa ayuba leper tazüng asübaji lir.Mary Magdalenei tama leper tazüngji angu. Aji sur Peter ser Yohan natia kasaji angu. Ano Yihuda nung Pa tepsetertemi Yisu tasü mangji nutsüngtemi aonung tanükertem amoa or alidang auya bener ao ta teyazü olulu prokba jagi parnoki memeteti leperji tazüng liasü ta küli sayu.

Yisu sur külen Pa nutsüngtemji tetsübu aser tatenen agi jena oa ki shibanger atsüka liau ta lai nungji shia angur(Jn.20:19). Iba ama tsübuseta aliba tekapu külen masüng telok ka jagi tesem ka nung Rom nung sepai aser Yihuda nung telok ana,asemi melentepa nuka aliba kati oa tasü mang ka auya bener otettsübaji tamakoktsü lir.(Mt.27:62-66). Aser tamangtsü lir.

Yisu asüba putu nungi tanü tashi telok tapu aikati Yisu temangji kong koda sama ta bushisungdang. Saka tanü tashi kecha tsüngsu maka aser mangur. Kechiba? Kechiaser Yisu shia arur asünung leper nung mali. Teyazü otsü tapu aika purateta jembitsüa akok, saka iba jagi Leper tazüng asüba küliji mesamataksütettsü.

Yisu shia aruba küli rongnung kaji Pai shia arur külen Pa nutsüngtem telok balala dang aser tesem balala nung adoka sayu. Mezüngbuba nung Mary Magdalene dang adoka sayu, tanabuba nung nutsüng ter dang adoka sayu, Tasembuba nung Emmaus lenmang nung nutsüng ana dang adoka sayu, pezübuba nung nutsüng terka dang adoka sayu, pungububa nung Tiberia awatsüng nung nutsüngtem dang adoka sayu aser tatesa Pa nutsüng noklang pungu tak temai repranga lia Pa kotaki atu.

Osangtajung Mark aser Paul shiti kar zülu tashi nung Yisu tasü nungi shia arua alima nung aliba parnok tenu küli akar ano aika mesui taküm liasü ta ashir. Aji oda Osangtajung zülurtem aser shititem zülurtemi teyazü züluka asübo Rom sokar aser Yihuda nung jagi ashishila aser melenshia züludaktsüla. Saka yamaji meinyak. Item küli ajanga angatetba agi Yisu asüba aser shia aruba indang kechisa lai nung züluogo aji shitak lir ta küli sayur. Anungji Yisu tasü nungi shia arua taküm lir.

Lai nungji shia aliba agi Yisu sur shia aruba osangji angashir aser parnok tenuk agi ngur nutsüngtem tasü ita oda tasütsüa majemi Yisu sur shia aruba indang küli asüba angur. Yisu shia arubaji Pa nutsüngtemi tejangja metetba agi parnok dak tanela tasn ka poktetdaksü aser tasü majemi küli asütsü tenzük. Item tatalokba ajak jagi Yisuji tasü nungi shia arua taküm lir ta küli tejangja angur.

Yisu tasü nungi shia aruba jagi Pa asüba ajanga meimchir temenen tai atokba küli tali jangjadaktsür. Yisu alima menen meji sur shia aruba küli jagi Pa tak amanga asürtem ajak Pa ama shia arutsü ta ashiba tali jangjatsür. Ano Yisu tasü nungi shia arua taküm lir ta küli sayuba jagi Pa tak amangertem Pa den teti tatem Makai alitsü ta küli sayur aser ibaji ajanga tamang nung tasü tali itshia kümküma alitsü angazüker. TSÜNGREM TENUNG SANGANG YISU LEPER MATAK TAKOK NGUR SHIA ARUA TAKÜM LIR.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima nung Chosen Arogoi Easter den Foundation Day repsema among



March 31, 2024 nü Koinonia Baptist Arogo nung pastor, Medotseilieü Kiewhuo den Chosen Arogo nungi züngsemtem tangokba noksa nung angur.

Kohima, Metsüremi/March 31 (TYO): Amongnü Kohima nung Chosen Arogoi mezüngbuba Foundation Day amongba den Easter Sunday tekülem sentong repsema agiogo; iba sentong nung tongti o jembirji Koinonia Baptist Arogo nung pastor, Medotseilieü Kiewhuo liasü, ta Koinonia Media Ministry-i sangdong ka ajanga metetdaksü.

Mathi 16:19 nung ajemdaker Pastor Kiewhuo-i, Satan mapa raksatsütsü atema Arogo ya Tsüngremi tentettsüba lir, ta ashi.

Laisa Arogo nung tamangertem teinyaktsü shilem metetdaksüba den külemi Arogo nung züngsemtemi shilem magira Arogo maintsü, ta ashi.

Laisa, alima nung temelenshi atema Tsüngremi lanurtem amshir, ta ashi. Yisu Khrista tasü nungi shia aruba atema tamangertemi pelatepsüla, kechiyong Khrista shia aruba ajanga Pa sülen anidakertem nem takok agütsüogo, ta lai ashi.

"Arogo ka taküm alitsü aser aintsü atema Tanela Temeshi leniba nüngdaker. Tanela Temeshi medenra iba Arogoji Laishiba nung shia aliba ama masü," ta lai ashi.

Arogo karibo Tanela Temeshi mapatem anema inyaker, ta lai ashi.

Laishiba nung Peter taküm atishia lai, Peter-i Tanela Temeshi agizükba sülen pa tasü itta aküm, ta ashi.

Tanela Temeshi aruba sülen Arogo tenzük aser sayatonya mapatem atalok, ta lai ashi.

Sarasadem medenibo Arogoji taziüngla; yimjung aser taochi ajungkettsütsü atema Arogo nung telongjem alitsü nüngdak, ta lai ashi.

Kiewhuo-i, "Arogoi temelungjang ajak agi bendanga sarasademra ibaji anema shingaia menokdaktettsü. Tanela Temeshi ajanga alima amokbangtsü atema Khristantem dak tashi lir," ta lai ashi.

"Laishiba nung amenoka aliba Arogo kaji agütsüba Arogo lir, anungji züngsemtemi pei tajungtiba Arogo nem agütsütsüla aser Tsüngrem atema inyaktsüla," ta lai ashi.

Philippines nung Catholic tamanger 10 Kangki nung angenlok



March 31, 24: Good Friday (March 29) anogo nung Philippines yimtiba, Manila nung Catholic tamangertemi Yisu Khrista Kangki nung metabasayaa nisung asem Kangki nung angenlok; iba dak alia Pampanga province kübok aliba yimtsüngtem nunga Khristan tenet Kangki nung angenlok.

Pampanga province kübok San Pedro Cutud yimdak küm shia Catholic Khristantemi atangji Kangki nung angenlok daksür, aser ibaji reprangtsü atema Philippines nung densema bendang linük balala nungi nisung 20,000

adenshir. Philippines nung Roman Catholic Arogoibo iba ya ashishir.

Hokolbarnü Rom sepaitem ama sübor sepaitemi Kangki apurtem dakji lisü agi arep aser tesüsa inch 3 kojat agi teka aser tetsüngji Kangki nung angenlok.

Nisung asem rongnungji arrshi küm 63, Ruben Enaje bo tang agi 35benbuba Kangki nung angenlokogo.

Osangbenertem den jembidang Enaje-i, "Yisu Khrista Kangki nung mangenlok tashi Kangki apur jajadang Pai kechi bilema alitsü südi, ta ni shisadanga jaja. Ni kanga tain

akümer, anungji ni ano kwiben yamai inyaktsüar ni meshitettsü," ta ashi.

Philippines nung nütsüng million 110 lir, aser iba nungjagi shilem 80 bo Khristantem lir.

Temeshi Hopta mapang nung tamangertem karibo parnok sasa lisü agi areper, aser ibaji ajanga parnok menen shidoktsü, shirang aneptsü aser temoatsü angutsü ta amanger.

Ajisüaka Catholic Arogoi ibaji magizüker. Sarasadem aser chichiba temenen tatok meshia temeshi hopta amongba dak alaka alia oa meinyaktsüla, ta Arogoi ashir.

ANOGO ABEN TSÜNGREM DEN

Tasü nungi taküm dangi

"Pai tasüba samadakja, osangtajung ajanga taküm aser tasüba tesangwa daki bener aru".

- 2 Timoti 1: 10.

Kangki nung Khrista mapaji Tsüngrem taochi tiyongtsü sür inyak. Tsüngrem taochi agi meimchir tekümtet mapa inyak. Kümtetdakba Yisu Khrista aruba ajanga taochi talubusa adok.

Asenoki shisadangtsü asoshi telemsa asem - Kaji tesüba nung atalok aser tang alir. Ka tang temoatsü maneni alir, aser asemubaji tamanger ajak dang nangzükba.

Mezüngbuba, Pai tasüba endoktsü. Iba tetezü tasübaji joko mali ta masü. Khrista kangki mapa ajanga Adam menen temerenshi melenshi. Tasübai Khrista kangki nung ajuru saka makok. Yamaji tamangertem asoshi tasübaji tetsübuttsü mali. Kechiaser tamangertem asoshi Khristai teti asoshi tasüba madak takok tulu nguogo.

Tanabuba, Khrista asüba nung Tsüngrem nükjidong taküm adokdaksütsüba. Shia arubaji Tsüngremi tamangertem ajak nem taküm agütsüdak.

Tasembuba temoatsüji, asenok masütsü tenangzükba. Iba tetezü asenoki tasüba majangtsüla ta masü. Iba tetezü asenok tasüba nung teti malitsü. Mamangertem tasübai aibaji dang masü, saka tasü nungi kodanga madoktsü. Parnok asoshi tasübaji Tsüngrem nungi pilaba saka tamangertembo tasü süngkümi iaka masütsü.

France nung Interior Minister-i Arogo 4,530 nem security agütsür

March 31, 2024: France nung Arogo 4,530 nung temeshi hopta aser Easter tekülem agiba mapang tamangertem kümzüktsü atema Interior Minister, Gerald Darmanin-i police aser sepaitem 13,500 lemzükja Tenla kitem kima nung security agütsü.

Easter tekülem sentong agidang kiralongra tatalokbatem nungi Khristantem kümzüktsü atema Interior Minister-i Khristantem nem security agütsü.

Minister Darmanin-i, "Kiralongra nungi kümzüktsü atema Good Friday nungi tenzuka Easter Monday tashi linük tesem ajaklen ozüng benokba sepaitem lemzüktsür. Catholic aser Protestant Tenla ki 4,530 nung police aser anti-

terror sepaitem 13,500 lemzükja lir," ta metetdaksü.

March 22 nü Islamic State kiralongrartemi Russia yimtiba, Moscow nung aliba concert hall ka amakba sülen France nung ketdangsertemi Arogotem nem security agütsür. IS kiralongrartemi amakdang nisung 144 asü.

Tesüiba kümtem nung France nung kiralongra tatalokba aika liasü aser taküm küm tetenzüklena kiralongra asalentong ana nokdangteta liasü.

Amongnü (March 31) France nung Catholic aser Protestant Khristantemi Yisu Khrista tasü nungi shia aruba Easter mongogo aser Orthodox Khristantemibo May 5 nü ang amongtsü.

Arogo lenir 140-i Gaza nung rara anentsü ayongzüker

March 31, 2024: Alima tesem balala nungi Arogo lenir 140 dak temai Gaza nung rara anentsü aser teti yimjung alitsü atema tayongzükba agütsü.

Parnoki yimjak nung shidi ka ajanga, Gaza nung rara ajanga nüburtem kanga mejungi kongshio, anungji teraksatsüba anentsü aser sepaitem aienshitsu nüngdak, ta metetdaksü.

US nung Catholic putir, Sir Greg Knight densema Evangelical Lutheran Church aser Episcopal Church densema Khristan denomination balala nungi lenirtemi iba shidi nungji sign süogo.

Parnokisa US densema tashi tulu aliba linüktemi Israel dang raraba hadir ayokba anentsü ayongzükba den külemi rara mapang ozüng alema inyakerem nem temerenshi agütsütsüla, ta mepishi.

Shidi nungji yamai shia lir,

"Alima nung lenirtemi Gaza nung meimchirtem timtem bentettsü atema taziüngla o dang jembio, saka iba rara ajanga tebilemtsü balala bo sendoker."

"Israel sepaitemi anogo shia bomb amshia amakba aser ali nungi amakba ajanga nüburtem mejungi kongshir, iba dak alia nüburtemi nüngdakba service balala nokdangba ajanga nisung million 2 dak tema timtemer," ta shidi nung shia lir.

Arogo lenirtem jagisa, "Ojangji ojang. Onoki longjemer teti atema yimjung alitsü asoshi ayongzüker," ta metetdaksü.

Taküm February ita nung Justin Welby-ia Israel-Hamas tsüngda rara anentsü aser nisung tepsetba anentsü ayongzüka liasü. Iba sülen Rabbis for Ceasefire telok nungi Elliot Kukla densema nisung aikati Gaza nung rara anentsü ayongzüka liasü.

AO OSHI ANGAZÜKDAK:
TANÜ ANGAZÜKTSÜBA OJANG



Sükdang

(v) züngdanga asadang (count)

* Yimteni küm shia nütsüng sükdanger.

Süki

(n) sü agi yangluba ki (tent)

* Tanü asüngbo lokti senden süki nung dang alir.

OLONG PAITEP # 6743

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüak asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjildong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6742 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kiochtsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA

"MOST MOTORCYCLES TO RUN OVER A PERSON"



Guinness World Records (GWR)-i official Instagram page nung video ka sayuba nung India nunger Pandit Dhayagude-i otsü tassen ka yangluba lemsatapa lir. "Most motorcycles to run over a person - 376 by Pandit Dhayagude" ta ser GWR-i video ji prokshio. Tesüiba nunga Pandit Dhayagude-i iba otsü yanglua liasü aser idangji pai motorbike tarettem pa temang nung 121 ben süidakja liasü saka tangbo motorbikes 376 ben tashi süidakja tejenba otsü ajatetogo.

Tripura, Assam aser Manipur nung yipru süi



Guwahati, March 31, 2024

(Agencies): Deobarnep züngia Tripura nung yipru süiba den tzünglu aruba ajanga ki 616 tashi raksatsüogo.

Yipru aser tzünglu ajanga ki 37 ajunga raksatsü, ki 125 kanga mejungi raksa aser 454 terara raksatsü, ta Agartala nung aliba State Emergency Operation Center-i metetdaksü.

Tripura kübok district 8 nung Sepahijala district nung teraksa teimba liasü. Iba district nung ki 392 raksa ta State Emergency Operation Center-i ashi.

"Kiojen raksaba dak alia süngdong aika lao, electricity

poles raksa, lenmangtem noktang aser garitem raksa" ta sorkar ketdangsür kati ashi.

Külen, Assam nung Cachar district nung tsüngi aidang süngolu nung mapa inyaker nisung 6 yiru.

Deobarnü Digunsora tea estate nung iba lendong atalok aser teyirurtem Silchar Medical College-i anir ao.

Iba lendong nung yirurtemji Bimal Tanti, Ashu Sakha, Megho Tanti, Benu Tanti, Sephali Tanti aser Tiklu Bhowmik nunger ta jangjaogo aser parnok 6 medical college nung yaridar saka Tiklu

Bhowmik kanga mejungi yirua lir.

Deobarnü Manipur nunga mopung tesashi aonba, tzünglu kanga aruba aser tsüngi aia yipru aitba ajanga ki aser alu aser shiruru ayuba tesentem raksatsü.

Nagaland den arrtsüa aliba Senapati district nung rü kanga tsükba sülen anogo pungu lir tanü iba ya atalokogo.

Tanep 10:00 ako meta Thoubal district kübok Khongjom Sangaikhong yimtsüng nung yipru tulu ka süi. Idangji ki aika pongdok aser alu den shiruru ayuba tesentem raksatsü.

Congress-i Lok Sabha elections atema star campaigners metetdaksü

Guwahati, March 31, 2024

(Agencies): Indian National Congress-i Assam nung April 19, 2024 nü Lok Sabha elections agitsü aliba atema star campaigners tenüngtem metetdaksüogo.

INC-i Election Commission of India nem agütsüba list nung tongtipang lennirtem aika dena

lir. Iba ya Representation of People Act 1951 nung Section 77(1) nung lateta aliba ama inyaker.

Assam nung Congress party atema nüboyimtsürtemji Indian National Congress president Mallikarjun Kharge-i anir Sonia Gandhi dena lir.

Rahul Gandhi, Jairam

Ramesh, Priyanka Gandhi Vadra, Paban Singh Ghatowar, Raneer Narah, Kanhaiya Kumar aser Alka Lamba nungeria nübo yimtsütsü.

Assam nung Lok Sabha menden 14 nungi Congress-i 13 nung tokteptsü. Congress atema tongtipang mendentemji Nagaon, Jorhat aser Dhubri lir.

Meghalaya Minister AL Hek-i ARHI Hospital lapoktsü



Shillong, March 31, 2024

(Agencies): Meghalaya nung healthcare delivery tajungba akümtsü atema Animal Husbandry and Veterinary Minister AL Hek-i Mawsmi, Jorabat nung Angelcure Research Hospital and Institute (ARHI) hospital lapoktsüogo.

Iba sentong nung Local MLA Sosthenes Sohtun, taoba DHS Dr. Aman Warr aser ARHI Board members lia Outpatient Department (OPD) lapoktsü.

ARHI Hospital ya North East Cancer Hospital anasa lir aser taruba ita ishika tsüngda multi-specialty facility akümtsü.

ARHI Hospital nung tang

specialists 32-35 shi mapa nung aniokogo aser medical team nung doctor 100 shi anioktsü sentong lir. Iba mozü kidang nurses aser medical technicians 300 tema lir. Parnok ya Meghalaya nungi dang masü saka Assam aser tanga Northeastern states nungia anioka lir.

Iba mozü ki ya 'Service to man is service to God' tangatetba nung amendaker lapoker ta Minister Hek-i ashi.

"Onok ya fields aser pioneers balala nungi specialists lir anungji aika ajangshia aruogo. Onok ka akümtsü nükjildong lir aser Northeast o tangalen nungi specialists yangi arua inyaktüsü


ayongzüker" ta Dr. Sandeep-i ashi.

"ARHI ya super-specialty tertiary care hospital lir aser iba nung cancer care, cardiology, neurology aser tanga tashidaktem atema centres of excellence lapoktsü ta ARHI nung specialist aser board member Dr. Feroze-ia ashi.

"Specialist mesüra department shiai nübertem ajangzüchtsü atema inyaknütsü. Nisung ajaki parnok ji centre of excellence ama merangtsü. Ibaji ajanga hospital aser nübertem yaritsü" ta neurosurgeon Dr. Simranjeet Singh-ia ashi.

"Meghalaya nung heart surgery agiba nija mozü ki mezüngbubaji ARHI asütsü. Sorkar hospital NEIGRIHMS nung dang iba facility lir aser private hospital rongnung mezüngbubaji ARHI asütsü. Idaki heart patient mashii ka Mumbai mesüra Delhi-i moi operation sütettsü" ta cardiac specialist Bikash Rai Das-ia ashi.

PM Shehbaz Sharif-i sorkar sentong nung red carpet nokdangner



Ajisüaka iba ya bendanger tongtipang nisungtem atema dang amshittetsü, ta ashi.

Red carpets nokdangtsü telemtetba agiba ya tematazutsü ka atema dang masü. Ibai menüngdakba nung sen indokba aziöktsü aser item sen danga tongtipang maparen nung amshitsü asoshi lir.

Taoba hopta Ato Kilonser Sharif aser Cabinet züngsem temi pei sasa pei itasen aser danga teyari magitsü telemtetba agia liasü aser ibai sorkari rongsenketzüng tsütsü temelenshi arutsü mera agiba nung shilem ka alitsü. Taoba ita ato kilonseri iba mera ya sorkar asoshi teinyaktsü tongtipangtiba lir ta shia liasü.

Islamabad, Metsüremi/ March 31 (Agencies): Pakistan Ato Kilonser Shehbaz Sharif-i sorkar sentong nung red carpet mamshitsü tenokdangba agütsüogo aser item ya bendang lima nungi tongtipang nisungtem arur atema kisüng amshitsü mela. Sen agi kanga anünga aliba Pakistan linük nung menüngdakba nung senotsü indokba ajemtsü mechi pai mera balala agiba nungi ibai shilem ka alitsü. Sorkar sentong nung federal ministers aser

ketdangsurtemi semdangba mapang red carpet amshiba atema Sharif-i mepelaba lemsatepa liasü.

Cabinet Division ajanga ashiba agi, ato kilonser totuyuba nung red carpet mamshitsü tenokdangba agütsü.

Tarutsü nung sorkar sentong agiba mapang federal minister aser sorkar ketdangsurtem atema red carpet mamshitsü ato kilonseri totuyuba agütsü, ta Cabinet division ajanga sangdong ka nung ashi.

Linük nung rongsenketzüng tsütsü timtem ajurua aliba mechi Pakistan Tir Asif ali Zardari-ia itasen aser teyari magitsü telemtetba agia liasü.

Ita tetenzüklen Sharif ya tanaben ato kilonser inyaktsü tenangzüktep agia liasü. International Monetary Fund nungi sen USD 1.1 billion agütsütsü atema staff-level nung tezüngzüktep ka agir anogo ishika lir ano sorkari IMF dang senotsü teyari meshitsü sorkar tebilemba lir, ta Sharif-i Mongulbarnü shia liasü.

ARISHI KÜM 90 AJUNGBA TENÜNGSANG ANOGO



Tasoba : 1st April 1934
Mrs. Talipokla Pongen (Ungma) Wife of Lt. Longri Lkr.

Küm 90 tashi arishi moatsüba asoshi Tsüngrem tenüng asanger. Arishi ya Kibuba meyong lir, anungji ojala nem ano arishi moajang ta sarasademtsür. Temeim Chirnur, Anükapang aser Semchirseknur ajaki tepela salem lemsateper.

Gaza aid delivery mapang nisung pongu tepset

Gaza City, Metsüremi/ March 31 (Agencies): Gaza north tsütsü Honibarnü teyari agütsüba mapang injang khaloktsüba aser nisungtem nungtepba mapang nisung pongu asü aser ter dak tema yiru ta Palestine Red Crescent ajanga ashi.

Nisung asem khaset ta Red Crescent ajanga ashi.

Video footage nunga nikongdang distribution point ka anasa trucks ishika aodang nisung kar asatenba aser prangbong ola angashi, aser kar tekumdangtsü atema khaloktsü ta tenük kuli alirtemi ashi.

Anasa aliba Israel sepaitemi injang khaloktsü aser nisungtem chiyongtsü abeni aodang trucks kar agi atsük ta tenük kuli alirtemi osangbener dang ashi.

Ajisüaka Israel mitkar temi iba tatalokba mangashi ta ashir. Red Crescent ajanga ashiba agi, am aser danga chiyongtsü bena aliba truck 15 shi aruba sülen nisung meyerijang aika adenshi aser iba mapang lendong ya atalok. Item chiyongtsü ya Gaza City nung Kuwait roundabout nung agütsütsü liasü.

Iba roundabout nungya teyari oset agütsüba mapang lendong balala aser asü-ama ajangshia lir. Iba tesem nungya March 23 nü Israel sepaitemi

injang khaloktsüba mapang nisung 21 asü, saka Israel-i magizüker.

Gaza nung alir tasadang ka kangasa yasa-tzüra tia nung lir aser tekeraba nung teyari magütsüra Gaza north tsütsü aya-wara tenzüksü ta UN ajanga March 19 nü sangdong ka nung ashi.

Tensa ya Gaza north tsütsü tali tamajungba lir, kong nisung 300,000 shi lir aser March ita tiyong nungi May ita tashinung mashi mapang aya-wara tenzüksü tejangja, ta United Nations-i shia arur.

Gaza nung mozüki tulutiba temeket nung densema Gaza Strip nung rara manener aser Hamas meyong health ministry ajanga ashiba agi, tesüiba ghonda 24 tsüngta nisung 82 tepsetogo.

Tesüiba ita pongu tsüngta Gaza nung nisung asüba aser yiruba 108,080 lir ta ashir.

Gaza nung aliba health ministry ajanga ashiba agi, nisung 32,782 tepsetogo aser 75,298 shi yiruja lir.

Honibarnüa Israel mitkari Gaza nung mozüki tulutiba, Al-Shifa temeket nung anogo 13 buba operation maneni agitar, ta shia liasü. Israel-i tesüiba ghonda 24 tsüngta Gaza nung tayimtsü amshia 50 ben dak tema makogo, aser Gaza City aser southern Gaza nung tank amshia injang khaloktsüba lir.

Syria shishilembadak nisung 7 pokset

Damascus, Metsüremi/ March 31 (Agencies): Syria kübok northern Aleppo province nung Azaz yimti anasa nüburtem kanga mazüngi shilembaba shishilembadak ka nung gari ka nung bomb inoker pokdaksüba sülen nisung tenet poksetogo aser nisung 30 yiruogo.

Iba tesem nung alirtem aser teküzmükertemi Reuters news agency dang ashiba agi, iba bomb ya Honibarnü menor iba tesem nung aliba nüburtem Ramadan amungba ita anogo tepeyong lumiba sülen shishilemba-a aliba mapang pokdakja liasü.

Syria indang Civil Defence forces; White Helmets-i ashiba agi, iba lendong nung nisung 30 tashi yiruogo aser kanga mejungi yirur alirtem mozükitemi anirogo. Iba telok yagi mezüngbo X sabang ajanga tanur ana densema nisung asem tashi asüba osang agütsür liasü.

"Ozü teloki yirur alirtem aika nguteta yariogo aser iba tesem kanga junga asadangogo," ta White Helmets telok yagi ashi. "Bomb apokba ajanga dokan, nüburtem aliba ki, gari aser motorcycle aika raksatsüogo."

Yaseen Shalabi, shiba bomb apokba tesem anasa par kibong den shishilemba liasü, pai Reuters dang ashiba agi, bomb apokba mapang nung iba tesem nung shishilembartem aika

adenshir liasü.

Iba bomb podaktsüba indang tang tashi nung telok kati danga nangzüka mali.

2011 küm nungi Syria nung civil war adoker lir aser iba ajanga linük maneni lemdanger lir.

Syria Tir Bashar al-Assad-i Russia, Iran aser Lebanese Hezbollah telok teyari agia linük asemsü nungi anabo aziökogo, ajisüaka northwest ya tang tashi opposition sepaitemi aziöker lir.

Azaz ya Turkey arrtsü anasa lir aser iba yimti ya Turkey aser al-Assad anemertemi teyari agütsüba Syria nung teloktemi aziöker lir. Iba yimti nung Syria indang interim sorkar amenoker lir, shirnok parnok ya temzüng ozüng kübok chichiba sorkar lir

ta shia arudar.

Kurdish YPG, mesüra People's Protection Units-i taoba mapanga iba tesem makogo. Iba telok yagi Syria north aser northeast nung tesem tuluka aziöker lir.

Turkey-i, iba telok ya Syria indang Kurdistan Workers' Party (PKK) kongsang ka ama züngshir, shirnok Turkey, United States aser European Union-i kiralongrar telok ka ama agizükogo.

Azaz nung nüburtem timba Arab nung lir aser Kurdish nungera aika lir. 2022 küm November ita iba tesem ya missile ka agi amakba sülen nisung pongu tepseta liasü. 2017 küm jila okadak kima gari nung bomb inoker pokdaksüba sülen nisung 40 dak tema tepseta liasü.

Taiwan-i China indang rong aser tayimtsü meita atadar

Taipei, Metsüremi/March 31 (Agencies): Taiwan aser China na tensa mejungi küma aoba mapang ka nung Taiwan-i Deobarnü China nung rong trok aser military tayimtsü pezü par litsü anasa inyaksangshia aliba lazükogo, ta Taiwan News sangdong ka ajanga metetdaksü.

Ministry of National Defence of Taiwan (MND)-i ashiba agi, China nung indang rong aser tayimtsütem ya Honibar anepdang 6 ako nungi Deobarnü 6 ako tashi

meita ataogo. China-i iba jenjang agiba telangzüba agüja Taiwan-ia, People's Liberation Army (PLA) inyakyim asadanga atatsü atema parnok indang tayimtsü aser navy rongtem yokogo aser air defense missile systems tena renema liasü, ta MND-isa shisem.

Ajisüaka PLA indang tayimtsü kati danga Taiwan Strait nung median line maden mesüra Taiwan indang air defense identification zone (ADIZ) telungi mai. Honibarnü Taiwan-i, China

nung indang military tayimtsü ti aser rong pongu aser Hokolbarnüa rong pongu aser military tayimtsü pezü inyaksangshia aliba lazükogo.

Taiwan-i March ita kija nunga China nung military tayimtsü 359 aser navy rong 204 parnok arrtsü anasa inyaksangshiba lazükogo. 2020 küm September ita nungi China-i Taiwan kanga rongshia arudar.

Kasa mapang nung Taiwan military-i, China nungertemi Kinmen anasa Erdan asetkong tangoktsü asoshi drone tem

amshiba tebilemstü ka-a bilemba lemsatepogo.

Online nung olulu osang ajang, unmanned aerial vehicles tem yagi Taiwan indang iba asetkong nung military inyakyimtem tangokba sayuogo.

Kinmen Defence Command-i ashiba agi, item drone tem yagi koda amokmerener aji asadanger jenjang agitsü. Military-i iba inyakyim ya aitsüogo aser iba ajanga tensa tamajungba akümtsü akok ta shiogo.

Miami Open: Bopanna-Ebden aser Collins nungeri takok nguogo



Matt Ebden

Rohan Bopanna

Danielle Collins

Metsüremi/March 31, 2024 (Agencies): India nunger nüngtugu tennis asayar Rohan Bopanna-i pai yanglur aliba otsü tasen yanglushia pa aser pa indang Australia nunger partner Matt Ebden nati Miami Open tebur tarep asaya akokba sülen ATP Masters 1000 ka akokba asayar tambusang kümogo.

Tenati taküm kanga junga asaya arudar aser Bopanna aser Ebden nati Croatia nunger Ivan Dodig aser America nunger Austin Krajicek na Deobarnü Hard Rock Stadium nung final nung 6-7(3), 6-3, 10-6 agi koka liasü.

Iba asaya akokba sülen Bopanna-i taoba küm arishi 43buba nung Indian Wells koka otsü tasen ka yanglur aliba ajatetogo aser tarep asaya rankings nung pa maneni temaba jenjangi tuogo.

Iba asayamung final atongba ya Bopanna atema ATP Masters 1000 final 14buba liasü. Ajak senteper iba final ya India nunger

asayar tejen atema ya ATP Tour level final 63buba aser tarep asaya title 26buba liasü.

Maneni Bopanna ya India nunger asayartem rongnungi Leander Paes sülen ATP Masters events teku prongla final tonga asayaba asayar tanabuba kümogo.

Bopanna aser Ebden nati taküm Australian Open-a koker lir. Australian Open akokba sülen Bopanna ATP rankings nung world No. 1 akümba asayar tambusang aküm, ajisiüaka Dubai Championships nung quarterfinal aser Indian Wells Masters nung round of 32 nung tsükba sülen pa tanabuba jenjangi asepzüka alu.

Kasa asayamung tetsür kija asaya final nung America tsür Danielle Collins-i Kazakhstan tsür Elena Rybakina koka liasü.

Collins-i iba asaya ya 7-5, 6-3 agi koka la atema tour nung final season asayaba mapang mezüngbuba WTA 1000 title ka benogo.

Arishi küm 30 tain Collins shiba world rankings nung jenjang 53buba nung lir la ya iba asayamung akokba asayartem rongnung ajak dang jenjang tekübokba nung aliba asayar kümogo.

Collins-i January ita la taküm küm tatemi asaya nungi anentsü ta sangdonger liasü aser mimlai lia lai iba asayamung final nung world number four asayar ya akokba ajanga asaya repringertem kanga pelatepa liasü.

La tawa kanga junga asaya arudar, ajisiüaka lai la telemtetba memelenshitsü ta shiogo. Iba asayamung akokba sülen Collins ya Hombarnü sayaba WTA rankings nung jenjang 22bubai atutsü.

Kasa mapang nung Rybakina atema tezüdangtsüka taküm agi küm anabuba atonga iba asayamung final nung tsükogo. Taoba küm la Petra Kvitova-i final nung tsükdakja liasü.


Babar tanaben Pakistan white-ball team captain kümogo

Metsüremi/March 31, 2024 (Agencies): Pakistan Cricket board-i Pakistan white-ball team captain mapa Babar Azam nem tanaben agütsüogo. Pai Shaheen Shah Afridi melenogo, shiba asayamung ka atema captain liasü.

"PCB indang selection committee nung züngsemtem ajaki mulunga tetuyuba agütsüba sülen PCB mendenbuba Mohsin Naqvi-i, Pakistan tebur white-ball (ODI aser T20I) team captain mapa abentsü atema Babar Azam shimogo," ta Pakistan Cricket Board (PCB)-i Deobarnü sangdong ka ajanga metetdaksü.

Taoba küm India nung 50-over World Cup asayaba mapang Pakistan team semifinal-a tonga masayatetba sülen Babar-i format asemprongla indang captain mapa tokja liasü. Ajisiüaka Afridi lenisüba nung Pakistan team-i 4-1 agi New Zealand den T20 asayamung mekoki liasü.

Kasa mapang nung PCB



mendenbuba tasenba Mohsin Naqvi-ia Afridi nem captain mapa kangabo mebendaktsünü liasü, kechiyong pai Pakistan Super League nung junga masayatet aser pai aniba Lahore Qalandars puri league asaya 10 nungi ka dang koka liasü aser parnok ponglang nung iba asayamung tembang.

Pakistan team ano kidang New Zealand den April 18 nungi tenzüka T20 asaya pongu asayatsü renema lir. Maneni parnok taküm USA aser West Indies nung T20 World Cup masaya tsüngda Ireland den T20I asaya asem asayatsü aser iba sülen ano England den T20I asaya pezü asayatsü renema lir.

Willey-i IPL toktsüogo; LSG nung pa melena Henry shimogo



Matt Henry

Metsüremi/March 31, 2024 (Agencies): England nunger left-arm seamer David Willey jurila maparen kar aliba ajanga tang asaya aliba Indian Premier League (IPL) nung masayatsü atema telemtetba agiogo aser Lucknow Super Giants nung pa melena New Zealand nunger asayar Matt Henry shimogo.

Henry ya base price crore 1.25 yong Lucknow Super Giants nung adentsü.

Taoba küm India nung ODI World Cup asayaba sülen Willey ya international cricket asaya nungi anena liasü aser pa taoba hopta Lucknow pur IPL nung Rajasthan Royals den mezüngbuba asaya nunga masayai liasü.

Willey ya taoba küm auction ajanga Super Giants nung aden. Pa IPL 2022 aser 2023 nung Royal Challengers Bengaluru nungi asaya liasü.

Pa ita ana dak tema ILT20 (Abu Dhabi Knight Riders) aser

Pakistan Super League (Multan Sultans) nunger amala asayamung balala nung asaya senzüba sülen kanga belematoker aliba ashishia liasü.

Willey ta taküm Lucknow toktsüba England nung asayar tanabuba kümogo. June ita T20 World Cup masaya tsüngda tali masayai atadaktsütsü atema English cricket board-i Mark Wood aninba sülen tang Willey-ia iba telemtetba agiogo. Wood ya West Indies nunger pacer Shamar Joseph-i melenogo.

New Zealand nunger fast bowler Henry, ya taoba mapang Punjab Kings aser Chennai Super Kings nungi asayaogo. Pai tang tashi nung IPL nung Punjab Kings nungi asayaba mapang IPL nung anaben asayar lir. Henry tang tashi nung New Zealand team nungi Test 25, One-Day Internationals (ODIs) 82 aser T20 Internationals 17 nung asayar lir.

Mirabai Chanu IWF World Cup nung asayatsü



Metsüremi/March 31, 2024 (Agencies): Tokyo Olympics silver medallist lifter Mirabai Chanu, yiruba ajanga ita trok tashi masayai lir la Paris Olympics nung asayatsü atema jangjatsü asoshi Hombarnü IWF World Cup nung shilem agitsü.

Iba World Cup ya Olympic qualifying event tatemangbuba dang masü saka Paris Games atema mandatory qualifier ka lir.

Chanu ta taoba küm September ita Asian games asayaba mapang hip tendonitis yirua liasü. La Paris Olympics atemabo qualify süatokogo.

Hombarnü World Cup nung shilem agiba ajanga la Paris Olympics nung shilem agitsü

atema jangja akümtsü. Taoba mapang world champion ya tetsür 49kg Olympic Qualification Ranking (OQR) nung China tsür Jian HuiHua sülen tanabuba jenjang nung lir.

2024 Olympics qualification rules kübok 2023 World Championships aser 2024 World Cup ya compulsory event tem lir.

Iba asayamung ana dak alia asayartem Olympics atema qualify asütsü asoshi, 2022 World Championships, 2023 Continental Championships, 2023 Grand Prix 1, 2023 Grand Prix II aser 2024 Continental Championships, ta item asayamung tem rongnung asem nungbosa shilem agitsüla.

Chanu-i 2022 World Championship aser 2023 Asian Championships nung shilem agiogo aser la tanabuba aser trokbuba nung iba asayamung ana tembanga liasü.

2023 Worlds aser Grand Prix II nung la shilem magitet, kechiyong la yirur liasü, ajisiüaka la Paris Games nung asayatsü atema temsüa akümtsü asoshi tenüngdakba jenjang ajak agiogo.

World Cup tembangba sülen top 10 lifters tem shirnoki atakzükja aliba ama jenjang tapet agiogo, parnok Paris nung asayatsü atema maongka angutsü.

Manipur tsür la ya taoba küm ana tashi tiruba ajanga kangshia arudar. La iba asayamung nung Group B nung ata lir aser la medal atemabo masayatetsü akok.

Maneni India tsürtem rongnungi Commonwealth Games silver medallist Bindyarani Devia iba asayamung nung tokteptsü. La 55kg event nung shilem agitsü, koba non-Olympic weight class lir.

BILEMDANGANG
 "Anepdang tebilemdangba tajung ka ajanga anogo melentsütsü."